
Фарғонада Халқаро сув анжумани бўлиб ўтди

Фарғона водийсининг асосий ер майдонлари трансчегаравий сув манбалари – дарё ва сойлардан келаётган обиҳаёт ҳисобидан суғорилади. Водий аҳолиси учун бу манбалардан оқилона фойдаланиш ўта муҳим масаладир. Фарғонада ташкил этилган «Трансчегаравий сув ресурсларидан оқилона фойдаланиш ва келажак авлод учун уни сақлаб қолиш» мавзусида ўтказилган халқаро анжуман ҳам шу масалаларга бағишланди. Икки кунга режалаштирилган анжуманнинг дастлабки қисми вилоят ҳокимлигининг Водилдаги қабуллар залидан бошланди. Қирғизистон, Тожикистон ва Ўзбекистон делегациялари вакиллари, уч мамлакатнинг давлат сув хўжалиги мутасаддилари унда қатнашдилар.

Дастлаб анжуман иштирокчилари трансчегаравий сув ресурсларини бошқариш, сақлаш ва ишлатиш бўйича тўпланган халқаро тажрибаларни ўргандилар. Давлатларимиз раҳбарларининг юқори даражадаги учрашувлари, Ўзбекистон ташқи сиёсатида яқин қўшничилик муносабатларига катта эътибор қаратилиши туфайли Фарғона водийси трансчегаравий сув манбаларидан фойдаланиш тизимида истиқболли йўналишлар очилгани қайд этилди.

Анжуман давомида ҳар бир мамлакат вакиллари ўзлари тайёрлаб келган тақдимот материаллари билан қатнашиб, мавзуга оид муаммоли масалаларни ҳал этиш йўллари кидирдилар. Сув хўжалигидаги ҳамкорлик давомида иқлим ўзгариши ва бошқа сабаблар туфайли юзага келаётган муаммоларнинг ечими ўрганилди.

Жумладан, халқаро ҳамкорлик, халқаро донор ташкилотлар кўмагида томчилаб ва ёмғирлатиб суғориш борасида инновацион технологиялардан кенг фойдаланишни жорий этиш бўйича фикр алмашувлар бўлиб ўтди. Халқаро ташкилотлар - Жаҳон банкининг сув ресурслари бўйича мутахассислари, Халқаро ҳамкорлик бўйича Герман жамияти вакиллари бу йўналишда ўз фикр – мулоҳазаларини билдирдилар.

Анжуманда иштирок этган Халқаро ҳамкорлик бўйича Герман жамияти лойиҳаси раҳбари КАРОЛИНА МИЛОВ шундай дейди:

- Анжуманнинг иккинчи куни биз 11 гектар боғда томчилаб суғориш технологиялари жорий этилгани билан танишиб қайтамыз. Бу лойиҳа Халқаро ҳамкорлик бўйича Герман Жамияти томонидан амалга оширилмоқда. Бунинг учун Евроиттифоқ томонидан 12 млн Евро миқдорида маблағ ажратилган ҳамда ушбу маблағлар ҳисобидан Ўзбекистоннинг Қашқадарё, Сирдарё ва Фарғона водийси вилоятларида илғор инновацион технологиялар кўмагида сув ресурсларидан оқилона фойдаланиш тизимини жорий этганмиз.

Анжуман иштирокчилари шу куни Фарғона вилояти, Фарғона водийси ҳудудида сув ресурсларидан ўтган асрларда халқимиз нақадар тежамкорлик билан фойдаланиб келганини ифодаловчи музей фаолияти билан ҳам танишдилар. Бу ерда сув ресурсларидан фойдаланиш, жумладан, сувнинг бир мисқолини ҳам исроф қилмаслик учун қайси кўринишдаги сув иншоотлари, гидротехник қурилмалардан фойдаланиб келингани ҳақида хабар берувчи бой материаллар ҳамда экспонатлар жойлашган.

Халқимизнинг сувга муносабати, Фарғона водийсида эса сув тежамкорлиги йўналишида амалга оширган ишларининг ёрқин намунаси эса, сўзсиз, Катта Фарғона Канали қурилиши ҳисобланади. Куннинг иккинчи ярмида халқаро анжуман қатнашчилари Катта Фарғона Канали қурилишининг 80 йиллик тўйига бағишланган тадбирда ҳам қатнашдилар. Унда қайд этилганидек, Катта Фарғона Канали Қирғизистон, Ўзбекистон ва Тожикистон ҳудудлари бўйлаб оқади ва 320 км масофага эга.

1939 йилнинг 3 июни канал таваллуд топган кун саналади. Шу санада эълон қилинган Ҳукумат қарорига кўра унинг қурилишига киришилган ва халқимизнинг мардонавор ҳашари, фидокорона меҳнати билан 45 кун деганда Катта Фарғона Канали қуриб битказилди ва у ўзбек халқининг меҳнат жасорати рамзига айланди. Канал казилишида иштирок этган халқимизнинг уюштуруш ва меҳнатсеварлиги нодир видеотасмаларда ўз аксини топган.

Байрам тадбири давомида Катта Фарғона Канали қурилишининг 80 йиллик муносабати билан

табрик сўзлар айтилди. Сувчилар, мироб ва гидротехниклар, КФК нинг эксплуатациясини юритиб келаётган инсонларга эҳтиром кўрсатилди.

КФК - Фаргона водийсининг тирик қон томири. У туфайли олтин водий ҳақиқий марваридга айланган. Халқимиз азалдан сувни зарга, сувчини эса заргарга қиёслаган. Зар қадрини эса заргар билганидек, халқимиз КФК да оқаётган сувнинг мисқолини ҳам исроф қилмай, тежаб – тергаб ишлатишга ўрганган.

Вилоят ҳокимлиги ахборот хизмати

2019-08-23 23:54:24